

## Parlamentario Miguel Mansur a entrega iniciativa di ley pa cambia leynan electoral di Aruba



**Parlamentario y lider di fraccion Accion21, Miguel Mansur, a entrega ayera mainta un iniciativa di ley cu tin como meta modernisa e leynan electoral di Aruba. E iniciativa di ley aki ta enfoca riba cinco cambio principal cu ta inclui duna ciudadanonan Arubiano cu ta biba den exterior e derecho di voto.**

Despues di entrega e iniciativa di ley di aki na presidente di Parlamento di Aruba, Sr. Raymond Kamperveen, parlamentario Mansur a elabora riba e cinco cambionan principal di e iniciativa di ley.

E prome cambio grandi ta extende e derecho di voto na Arubianonan den exterior, cual el a indica lo bira cuminsando cu e siguiente eleccion cu probablemente lo ta na 2028.

El a splica cu awendia pa motibo di diferente factor un persona por encontra su mes afo di su pais, pero e interesnan, sea familiar of di propiedad of cualkier otro ta keda mara na e pais di origen y pa e motibo ey, Mansur a enfatisa, kier modernisa e leynan y duna Arubianonan den exterior e derecho di voto.

“Nos ta kere esey lo cambia tambe e dinamica di politica na Aruba pasobra hopi biaha studiantenan y otro hendenan afo ta menos inverti den e partidismo cu ta caracteriza nos politica,” el a remarca.

E di dos cambio cu parlamentario Mansur ta propone den iniciativa di ley ta cambio na e votonan preferencial. El a indica cu esaki ta nifica cu es-

nan riba un lista cu mas voto ta yega parlamento na luga di segun numeracion riba e lista manera cu e ta actualmente.

E di tres cambio ta un reforma di e sistema di restzettel. E parlamentario a splica cu pa e prome restzettel un partido cu a yega 75% di kiesdeler ta bin den wega pa e restzettel, esaki no necesariamente kiermen cu e ta haya e restzettel, pero e ta conta como e averahe pa wak si e por bin na remarke.

El a sigui splica cu despues cu tur partido cu saca asiento haya un restzettel, y ainda resta, e ora partidonan cu a yega 50% di e kiesdeler ta bin den wega pa un restzettel, y no necesariamente cu nan ta hay’e. “E ta democratiza e proceso un tiki mas,” el a resalta.

Mansur a subraya cu e reforma di e sistema di restzettel ta importante. El a indica cu leynan di Aruba ta copia di Hulanda y den Tweede Kamer restzettel ta representa unicamente 1% di asientonan, mientras cu na Aruba ta casi 23% y na Corsou actualmente ta casi 44%.

“E ta distribucion hopi grandi di e boluntad democratico. Obviamente e cambio di votonan preferencial ta duna mas poder na e votador, e ora nan voto ta determina cual candidato riba un lista ta drenta parlamento y no necesariamente e numeracion,” el a remarca.

E di cuater cambio den e iniciativa di ley ta introduccion di eleccion primario, of pre-

eleccion, manera ta e caso na Corsou y e di cinco cambio ta introduci un limite di termino.

Parlamentario Mansur a splica cu e di cinco cambio aki ta nifica cu un persona por sirbi un maximo di 12 aña como miembro di parlamento, ocho aña como minister y ocho aña como minister president.

El a resalta cu su motivacion tras di e ley ta realmente pa modernisa e leynan di Aruba. El a menciona cu actualmente tin un situacion “absurdo” desde eleccion 2021 cu e tres partidonan di oposicion a saca mas voto cu e dos partidonan cu a forma coalicion di gobierno, pero mas voto a wordo traduci na menos asiento.

El a remarca cu esaki ta un punto importante pasobra no tin suficiente renobacion den politica.

“Una bes nan t’ey nan no kier laga bay nunca. Mi ta pensa cu politica ta, bo mester drenta bin cu bo idea bo vision ehecuta bo plannan y despues bay back bo carera. E no ta echt algo cu mi kier wak hendenan ta pasa henter nan bida den politica, dus limite di termino manera tin pa gobernador caba y otro instancia ta importante pa nos introduci esey den politica tambe,” Mansur a indica.

Por ultimo, e parlamentario a splica cu den pasado tabatin iniciativa di ley riba esaki, el

a bin cu amienda di ley riba esaki pero te ainda no tabatin un sosten di mayoria pa pasele. E iniciativa di ley aki tabata parti di su plan legislativo, pero gobierno a cay y e no por ta parti di e eleccion binidero.

E iniciativa di ley a bay Raad van Advies (RdA), cual lo tuma seis pa ocho siman pa duna conseho, y e idea ta pa tin ley cla, pa si Accion 21 yega asina leu, durante formacion nan por exige pasada di ley, of sikiera cierto puntonan di ley.

Pa loke ta trata resistencia pa un ley asina y e proceso di convence sobre todo partidonan grandi pa acepta e cambionan aki, parlamentario Mansur a splica cu berdaderamente tin un resistencia, specialmente di partidonan grandi y tradicional di cambia leynan electoral pasobra nan ta custumbra y beneficia di e manera cu e ta na e momentonan aki.

El a enfatisa cu e momento pa haci’e ta durante formacion. “Despues di eleccion tur dos ta desespera pa drenta gobierno, ta probabel cu lo tin otro coalicion, dus e partidonan cu tin yabi sea nan so of den combinacion cu otro partido, eyan ta e momento di extrae sanger. Bo mester ta prepara pa no tuma promesa cu ora gobierno sinta nos ta bay pas’e, durante e formacion pasa e ley,” el a subraya.

Tocante e cambio pa duna Arubianonan den exterior

derecho di voto, miembro di prensa a puntra si e gastonan pa esaki ta factibel mirando cu no por duna Arubianonan na un pais so e derecho aki, pero meter haci’e pa tur Arubiano na otro paisnan tambe.

Mansur a splica cu nan a studia con Hulanda ta haci’e. El a indica cu e pais caminda tin mas Arubiano den exterior ta Hulanda y eyan lo usa e gabinete di minister Plenipotenciario y recursonan di Arubahuis pa tin un stembureau eyan.

Pa loke ta Arubianonan cu ta biba den otro pais el a sigui splica cu nan lo haci’e via post, via embahadanan Hulandes, manera ta e caso aworaki pa eleccionnan di Eerste y Tweede Kamer.

El a agrega cu lo mester aumenta e presupuesto di Consejo Electoral pa por eherce e tipo di cosnan aki, pero usando internet y post manera ya caba Hulanda ta haci e no ta algo exagera. “Mi ta kere e democratisacion cu ta bin a traves di esey sigur ta un inversion cu ta bale la pena,” el a resalta.

Riba rednan social algun ciudadano tabata cuestiona e validez di e ponencia di Mansur puntrando pakico personanan cu ta biba afo y cu no ta paga impuesto na Aruba lo mester tin derecho di vota den eleccion cu na final di dia e resultado di esaki lo tin efecto directo riba e ciudadanonan cu ta biba na Aruba.

